

摘藻堂四庫全書薈要

集部

欽定四庫全書薈要

集部

圭塘小藁別集卷一



詳校官助教臣謝登雋

欽定四庫全書薈要卷一萬六千三百二十四

集部

圭塘小藁別集卷一

元 許有壬 撰

太常可行弟升官其七十八歲兄以詩賀之  
曰

家雖通日觀身自植雲梯鬢雪行還漆腰金遂換犀遙  
情今俗異高興昔賢齊兄老無他技惟求醉似泥

漫述

偃伉勤成立其原得母長郎中光武世馮氏遂蕃昌後  
世論婚娶徒知慕貴強吾詩非漫作人道是良方

次來韻二首奉寄可行賢弟一笑

洹水悠悠晝夜東如君鄉里尚萍蓬士師無愧任三黜  
賢聖有時聊一中自分衰慵乖世用且將栽接代天工  
年來仇敵消磨盡酤酒田翁最長雄

老境生涯合務農誰教鷗鷺日過從窓含竹影宜高枕  
履印苔痕襯瘦筇風月歌詞非楚些江湖交友憶吳儂

獨憐多少看雲意三月書才見一封

圭塘獨坐有懷

韶濩鏗鉤杳嗣音樹林清邃憶同陰  
停雲霑霑日將暮  
伐木丁丁山更深飯罷竹邊時策杖  
茶餘松下獨彈琴  
直須月到天心處尊酒悠然與對斟

題可行太常人海浮槎齋

八十瀛洲樂素貧豈知京國是天津  
子今不患恩波隔  
我老何憂病後新一癯昨餘分固好  
三升門下送宜頻

年來莫笑無佳句甘作人間飲食人

有孚和右甲辰二月十八日以上尊暨朔南諸  
品竒果珍穀拜我兄圭塘先生於磨甕堅齋酒  
酣歡甚適得前藁走筆次韻聊發一笑因見詩  
禮家庭只此便是無窮清樂也明年再續謹附  
率爾之詩於後

浮槎名室頗宜貧人海茫茫孰問津九陌紅塵三島近  
一天清景四時新飄搖只恐因成癖來往多應不厭頻

但得仙翁時共泛絕勝前日自乘人

送張困亮鍊師

并序

予養痾鄉廬簡出入獨謁阡不免阡距城西北餘十里  
道北郭實南北孔道每為駟使識陪留多事故出入必  
以星至正己丑三月二十一日謁阡歸過洹橋數騎追  
及天已星猶懼其或我識側帽緩轡道左以俟其過前  
驅已前俄聞揚言此中丞邪亟來見乃困亮張君鍊師  
代祠武當馳駟而道此也明日過予出京師錢章詰曰

出京時念必過相一見虛前紙請言幸勿靳予交閑閑  
大宗師與其徒多善困亮主京師東嶽祠園杏千株人  
境俱勝送客東門若自公有暇即造焉困亮脩潔能詩  
見必觴詠忘返別一年矣當予避客時輟擊肩摩中天  
復已暝乃邂逅相遇豈偶然哉遂不忍以疾辭贈之詩

曰

杏園陳迹夢暄妍馬上相逢豈偶然每憶可人如隔世  
不聞新句又經年花迎驛路飛紅雨香到朝山散紫煙



王事遊方歸有日遲君洹水白鷗前

五月二十一日曉窓月明枕上漫述奉可行一笑

涼風清浥露漙漙淨滌京氛豁大觀  
驥不一鳴真伏老鵲猶三匝自求安  
嫦娥宮殿雲休妬病叟壺觴興未闌  
朋舊過從話新事可憐俱訴酒為難

年來雖樞要官亦苦酒衰病服藥

資用尤切故漫及之

可行太常饋浙間朋舊所寄糟梅以之薦酒風

味殊勝賦二十字記平素之未嘗食者

壬寅八月二十一日

佳實元登鼎和羹日奏功年來歸隱地好在醉鄉中

題可行所歲米元暉雲山小景

傳云五百歲名山始一開木禾長五尋和氣暢九垓往  
者既不及孰能待其來濟勝事游覽我姑陟崔嵬又苦  
道路艱荆榛滿氛埃不如跼斗室寓畫攄靈臺聊將萬  
里意收作小蓬萊

幻菴送新茶蒲筍以詩荅之兼簡太常弟過目

珠蕾鮮初摘冰芽鬱未舒分甘出圓嶠伴食謝中書京

國慙饗祿田園夢荷鋤多情老仙友能慰渴相如

和可行展省歸過圭塘即席韻

墟里煙塵外巾車日日来疎林呈半塔初日見三臺酒  
每從鄰貫詩寧待雨催衰年懷易感為我少遲徊

四月二十七日莊之淵昆季治具至圭塘醉中

賦奉寄一笑

拂水垂楊貼水荷圭塘風景正清和豈能奇字供人問  
深愧羣賢載酒過花露墜紅沾杖履松雲凝翠遏絃歌

也知節飲宜衰病其柰鄉情醉更多

圭塘小酌廷彥不飲故諷之請可行和韻

松檜蒼蒼柳半黃天光雲影爛圭塘鶴隨尊酒穿松徑  
風逐瓶花入草堂山好自供青眼舊機深誰道白眉良  
但教晚節秋無恙不負韓家畫錦鄉

秋露白酒熟卧聞槽聲喜而得句可行當同賦  
也

治趨辛勤夏竟秋奇功今日遂全收日華煎露成真液

泉脉穿巖咽細流不忍撥醅斟甕面且教留響在床頭  
老懷磊磊行澆盡三徑黃花兩玉舟

至正改元四月十三日戊子皇帝御龍舟幸護  
聖寺中書右丞臣特穆爾達實叅知政事臣阿  
魯臣有壬扈行樂三奏命右丞前特授平章政  
事叅政進右丞臣有壬進左丞懇辭不允惶汗  
就列平章右丞曰今日游騁之盛恩遇之隆不  
可不紀也悚懼之餘為二十韻以獻

宇宙承平日邦畿壯麗鄉宮中無暇逸湖上暫翱翔鳳  
輦重雲降龍舟萬斛驤風霆隨桂楫日月運牙樯五衛  
分翬羽千官列雁行長年花壓帽仙妓錦連航絨綵初  
徐引鑾旗旋遠揚舜軒呈曼衍傑侏迤鏗鏘玉食傳麟  
脯冰壺出蔗漿魚鳶知永蹕鶯燕逐餘香夾岸金戈翊  
彌空綉幕張汀迴開瀚海天近勝錢塘翠閣戕雙島珠  
簾護兩廂九霄披瑞靄四表覩朝陽補助資游豫登崇  
貴俊良不圖推朽質亦復被清光左轄綱維地中書政

事堂出謀慚不武好學願無荒喻水民堪畏從闕策最  
長濟川非所任歌詠獻巖廊

右七月十二日書寄可行御史社酒治聾昔嘗  
飲之恐遂不聾不能顧曲之誤却喜是非都不  
知又形諸詩今春可行送社酒方以為喜大社  
之餘致效當尤速然而飲之已酸治聾之效又  
無望矣而今而後又不聾矣多聞不能忍必又  
多事為之詩曰

予生苦多口三緘非不知譊譊徒自戒謀謀尋復隨齋  
扁磨甿堅訓勉朱子遺客至愛異觀何益於我為社酒  
堪治聾昔嘗屢飲之恐遂太達聰多事添驅馳茲得大  
社餘其效想倍蓰胡為負宿氣曲直至我眉朱門列畫  
邸食前方丈施我瓶都幾何後望饒涎垂老奚笑相勸  
處世聾最宜

和可行都司韻 二首

常恨看雲日暮時清尊才得浣離思脩程騏驥須千里



老境鷓鴣但一枝半世空隨人俯仰諸公自佩國安危  
年來點檢閑中事種玉栽蘭儘未遲

枉尺安能復直尋田園幸不負初心山凝暮色供屏障  
菊泛清香噴水沈好句每因吾弟得濁醪時共老農斟  
圭塘霜後清如鏡偏照蕭蕭雪滿簪

至正庚寅二月大雨麥成疸十得一二夏秋復  
早傷穀郡東至赤地稊稗穰生民幾得兩月食  
窮冬告盡遂至顛沛忍待萌芽以供掇擷春又

大寒迫清明雪三尺即事二首賢弟請和

榆不輸錢遂裸身春深何事未知春陰連殘臘經三月  
寒挾凶年殺幾人厨饌珍羞自漿霍市屢糟餅雜糠塵  
因思當軸曾持論今日方知隴畝民

天教稻稗治疲癯萬口磬磬一瞬空子女不如鷄犬價  
官民真是馬牛風纖萌其忍加水汙枵腹誰能用雪充  
泉下龔黃呼不起漫歌憂國願年豐

僮屋為大雨所仆歌代書寄奉吾弟一笑

庚寅九月

十又  
八日

豐安坊西李氏宅締構甲子逾周天我歸我里却無屋  
割金買居今七年中堂苟完遂龜縮傍舍草茨繩樞然  
諸僮環處數百趾分房戢戢蜂窠聯早乾跨歲三百日  
縱雨簷溜才涓涓伊誰鼓勇恣傾瀉通衢一夕流為川  
坐令闔郡若一室藩籬剖決無中邊朝來異響忽震地  
連宗接棟皆傾顛抉泥出嬰幸免死庖厨竟日寒無煙  
昔知將覆不早治今日至此誰之愆萬間初庇及寒士

此心已負歸宜遯家僮瑣瑣不能比庭荒况說治其田  
作詩自笑實自愧敢效茅屋秋風篇

可行太常弟侍皇太子奉旨春祭獨執多禮無  
不合節喜而賦詩

宗廟吾儒有事榮子今兼事復能名聯班末吏雖無分  
却幸胙餘沾及兄

歎衰憶橘二絕句令小蓋馳寄可行弟

附火平生憎乞相憑高時復豁雙眸今冬筋力衰多少

終日圍爐不上樓

南果珍奇有木奴年年包裹及饒夫徐州近日舟航斷  
歲貢尚方曾到無

觀家人治蠶事蠶將老而桑不繼求買甚艱窘  
因成口號呈可行太常弟

千古南陽一草廬其中今有卧龍無三分二表都休論  
且學栽桑八百株

癸巳六月二十日夜不寐忽聞麝香喜成口號

舉似太常過目

蓼香通夢報寒齋五齊前驅次第來更約西風勞縱叟  
東籬早放菊花開

伏日觀楨輩作秋露白麴蘖喜其製法甚精以  
口號二十八字勞之可行僉院同發一笑

胸中文史日雖多其柰家貧累衆何却喜薄田秋得秫  
衰翁常要病顏酡

促楨釀酒戲成一絕請賢弟同賦

麴香連夕透衾裯聞道劉村秫亦收衰病邇來惟患渴  
醞蒸何必待中秋

女孫彌月奉常作詩諷楨治具醉中走筆次韻  
奉常多事待圖回時為衰翁忍凍來家醞帶糟宜瓦鉢  
好懷初不在金罍

至正甲辰三月十一日昧爽枕上信口成二十  
八字盥洗畢飲孫女福潤杯酒適太常可行弟  
至同飲歡甚以水玉金絲闌牋求書因試浙筆

書以贈之

枕上鷄聲遠未融春深無柰雨和風圭塘八十新懷抱  
覓句銜杯與少同

即席奉和偶然記得僭附於左

弟有孚

絳帳何須說馬融每來席上坐春風年高德邵誰能及  
不獨當時詩酒同

京南春雨燕泥融輦下花時每值風今日無風更無雨  
賞心知有幾人同



承贈蒲萄阿爾奇感慰不能自己遂成二十八  
字亦頗得意為後日張本七十八歲兄某力疾  
書

西醞蒲萄貴莫名煉蒸成露更通靈文園渴思雖挂海  
不及浮槎一卵瓶

寄可行

衰年承乏近鄉間汴相相望三百餘欲見天恩優渥處  
五旬七得小兒書

景延堂下壽安紅  
百朵花開穀雨中  
草薦棘藩須擁護  
莫教霜雪損芳叢

寄苦尚書才卿

民事軍興日不遑  
間人一旦似公忙  
憑公寄語圭塘月  
好照吾家老海棠

郝信使附鴈足詩

霜落風高恣所如  
歸期回首是春初  
上林天子援弓繳  
窮海縲臣有所思

士隆賈知府以邊驚畫鴨見寄賦二絕句以謝之

圭塘柳影浴毳毳  
喋蒲根絕點埃  
政爾凝思舊風致  
蛻形毫素忽飛來

能言充貢固相誣  
誰道呼名一字無  
收入畫圖登几案  
遂令名亦不能呼

寄觀國賓

白頭誰遣抗紅塵  
屈指名場四十春  
臺閣鳳麟非所偶

江湖鷗鷺久相親  
宦情病後渾如水  
詩思年來尚有神  
何日與君携手去  
黃華籬下岸烏巾

近作詩莊長句代書寄賢弟一笑

圭塘有地無生涯  
三逕松菊四序花  
詩仙本是貴公子  
何事肯到山人家  
山人已分友木石  
塵俗芸芸果何物  
在家已作有髮僧  
小小園池聊掛錫  
千紅萬紫遺西東  
杖藜步步隨香風  
相逢一笑便傾倒  
但愧問字非揚雄  
載歌伐木賀得友  
昌黎去後誰山斗  
雕蟲小技久不為

敢說當年八义手詩莊千頃躬維持饑不可食寒不衣  
主人收蓄及遺逸要使後世均揚輝世間何物不腐朽  
好詩在世獨能久有詩又在未朽時此莊不可無醇酒  
莊中之詩幾萬首以詩侑酒為君壽

邇來切用無筆口號二十八字訴於可行太常  
平生交契分疎密毛穎何嘗一日疎休道病翁非所與  
明憲歌曲尚能書

可行留浙詩促其歸

甲申歲也

秋征曾有約十月便歸來南國鴈已盡東風花又開酒  
缸連月備詩擔幾時回手種洹溪柳青青滿釣臺

贊

可翁自贊書以為可行太常弟一笑

咄圭塘子一小丈夫生乎今世而為古愚不力上達乃  
甘下趨年來事業益迂且踈但問其壺日有繼乎

楊和卿畫像贊

緊鑑取形毫釐不失人知肖貌孰覈其實好古博雅寓

意自適器徵三代之制書究六朝之蹟掇粉墨於斷鱗  
攷欵識於土蝕琮璜闕盧琥璣琬琰山玄水蒼截肪蒸  
栗名稱實繁形狀匪一一過目頃皦然璞腊尚友千載  
濟以精識之人也雖晦迹于市廛其洗玉池主人之匹  
與

僧格實哩監司豸冠像贊

任法象服制敬惟欽直蓋所性觸非其心有敬主內有  
類著外仇視佞人德遇善類勿謂至堅佞則爾摧勿謂

至柔善則爾維我昔斯我人與其稱炯如清水玉壺輝  
映秩秩憲紀矯矯蓋臣風霜示肅閭閻以春惟其有不  
觸之觸使邪自正而曲自直此其所以為大過人也

托克托穆爾御史豸冠像贊

文運猶日方晝或晦傾否有時敦牂紀歲積陰釋汭大  
明麗天南宮柵棘當宁渴賢藹藹多士于于計偕識者  
常言有王佐才彼美擢科騰實蜚聲仕已泉達學且日  
增有類而戕姦摧佞伏行所無事肯專咋觸材俊任法



名殊實一毛亦致用帝帳斯緝予豈誇惠文彈治之為  
能蓋將徵識者之言於他日也

講議

端本堂

十月二十  
五日進講

尚書說命曰王人求多聞時惟建事又曰惟學遜志務  
時敏厥修乃來又曰念終始典於學厥德修罔覺世祖  
皇帝至元三年十二月遣中都海涯喻旨儒臣朕宜聽  
何書其議選來進於是商挺姚樞竇默王鶚等言帝王

之道為後世大法皆具尚書乃以進講

皇太子力學有年此書講明熟矣溫故知新方是為學  
求多聞者資之於人學古訓者反之於己遜其志者如  
有所不能敏於學者如有所不及虛以受人勤以處已  
又必始終此念不少間斷則事立德修有不知其然而  
然者矣三代而下漢稱文帝唐稱太宗文帝將賈誼治  
安策極言諭教太子諭教之道舍學何以哉故雖聖人  
亦資於學五帝三王皆有師也唐太宗謂杜正倫曰朕

年十八猶在民間民之疾苦情偽無不知之及居大位  
區處世務猶有差失太子生長深宮百姓艱難耳目所  
未涉卿等不可不極諫又曰朕自立太子遇物則誨之  
見其飯則曰汝知稼穡之艱難則常有斯飯矣見其乘  
馬則曰汝知其勞逸不竭其力則常得乘矣見其乘舟  
則曰水所以載舟亦所以覆舟民猶水也君猶舟也見  
其息於木下則曰木從繩則正后從諫則聖作帝範十  
二篇以賜太子曰君體建親求賢審官納諫去讒戒盈

崇儉賞罰務農閱武崇文且曰脩身治國備在其中當更求古之哲王以為師如吾不足法也吾居位以來不善多矣益多損少故人不怨功大過微故業不墮然比之盡美盡善固多愧矣汝無我之功勤而承我之富貴竭力為善可不謹哉恭惟皇太子殿下元良仁孝屬天下之望已力於學惟終始此念不少間斷更求忠鯁之士拾遺補闕則功業之盛豈特漢唐之君而已哉將見與三代並隆矣

跋

賜沃稜右丞節用二字

宋李沆作相嘗讀論語或問之沆曰沆為宰相論語中  
節用而愛人使民以時兩句尚未能行聖人之言終身  
誦之可也皇太子以天縱之聖肆筆成書節用二字賜  
中書右丞臣沃稜臣沃稜裝潢寶襲俾臣有壬識左方  
臣有壬竊聞易曰節以制度不傷財不害民盖侈用則  
傷財傷財必至於害民皇太子不他書而書此二字不

它賜而賜中書臣其旨深矣臣沃稜其力事斯語仰副  
儲訓則財阜民安不日見之矣中書政務有重於此者  
乎

銘

彰德路刻漏銘 并序

燕吳秉彝守相舉墜理禁期月就緒身施於政殆無遺  
者器闕乎治復有資焉惟相地劇民夥晨昏有禁鐘鼓  
之吏候驗以臆公私趣事遲速無節過故滋敝吏則非

矣亦由無所考質而至於斯也資糧扉屨前政是急正儀審漏有不暇焉吳侯懼事之墮人之病也旁諏其制則而治之八壺既陳一刻無忒屬銘於郡人許有壬以彰其勩以勗其繼以永其制吁可以觀政矣銘曰

在昔觀漏水而制器也實惟軒皇開物混茫蒼姬秩職挈壺始章遠寢無節瞿瞿則狂治襲曠代不肯以亡損益戾真寒暑乖方制昧洪殺景差短長爰折其衷咨治孔良金壺豬清玉蚪引吭委於尾閭原於天潢盈科線

出激電矢却允符儀晷無間雨暘流珠釋用聚攬靡亢  
析憲夷隩安時吉康昏明示信率由天常信則民立我  
治以臧焯茲永憲嗣罔不覆

記

筠齋記

泰定丁卯先公捐館京師先友江南者誇山水之勝勸  
扶柩南且賙以地京師者則曰西山有佳地子南北無  
恒產不幸罹荼毒於斯斯亦妥靈之地也亦有指以地



者而鄉里士大夫則不然其尤有意者至忽然曰子欲子孫浮華則南欲因京師富貴則此我知者父母之邦爾荒迷中神魂無主三議鬪胸中太夫人泣而言曰我平生作夢無一不在鄉里兒其決哉議遂決既藁殯走湯陰拜先塋不獨苦滂而亦陋不容竈矣從教授緱君允中改卜焉安陽城西山水靡不履歷始得武官原洹水之陽今阡而定畫遷措皆允中為之允中學儒者也盡去俗師荒唐禍福之說壬申太夫人歸葬得其人益

詳蓋外方內恭安命之士也戊寅予得請歸請記其齋  
曰筠者予知其安於所遇而念其才可施用束於冷局  
也扁筠之義其有不可自揜者乎古今人例喜言竹居  
必種植詩必托興其性若節言之備矣以言其用則簡  
牘箭筈箠簫笙簧篴篥篴席纜維滕絡之屬皆是也而  
其用之尤切者筠焉記言竹箭之有筠筠竹膚之堅者  
也竹寒暑一致守雖在節禦捍襲護使不能干其內則  
筠之功若篴席篴篴纜維滕絡獨析其膚爾肉則薪也

而簡牘箭筈箛簫笙簧雖膚肉俱用膚或有損則為棄物矣人謂允中幽閑曠適託於竹而已不知允中可施於用若竹之有筠也予不能施允中於用念其有力於先塋記其詳以志其交之始聲其才以待世之用者焉

### 竹軒記

士生世析圭儋爵獲據厥蘊至於晚節進退所以收幼壯之成功者尤不可不慎也禮大夫七十而致事蓋憫其勞久力憊不敢煩以政上之德也士難進易退義苟

當去浩然莫留各盡其道矣廉恥不張乃有膠榮而諱  
耄者其愈下者羅列選籍徼幸萬一於是有司逆計仕  
年大書其籍曰致仕至有廷辯謂筆吏考錄之誤又無  
以議為也風俗至是果孰使之然哉昔叨左司宰相稱  
吾鄉續公景明之賢擢禮部員外郎尋陞懷慶路總管  
至則值歲大饑勸分不足發公廩以賑國制粟幣無上  
文毫粒不出乃謂僚佐之凡者曰吾任牧寄候得請皆  
餓莩矣有責願獨坐又止其租稅報下皆允天歷初郡

直兵衝飛輓萬計軍興不乏西兵入境官吏星奔獨守  
境土遏流竄兵罷民既安堵即投紱歸身未衰年未及  
也至順壬申以嘉議大夫禮部尚書致仕闕齋所居植  
竹數本扁曰竹軒竹之為植冰霜凌虐而色不改凡卉  
彫盡而守益堅有節若是故君子貴之其風聲月色為  
溪山清勝者不與焉人平居氣溢者驕才少摧抑損穫  
殆盡遇變而不失其守者鮮矣尚書掾左司已有聲若  
司程綺源覆實儀曹之剴繁知陵州之善政人能道之

若夫遇變而不失其守時可安享而勇棄之則進退之  
際明矣嗟夫富貴多憂之資也世途設險之穽也道義  
不明而能保終始無悔吝者幾希鐘鳴漏盡而不止行  
百里躓九十者接迹焉則身未衰年未及而退者不賢  
能之乎然世有以官為家退無以官

關

者故不擯不止尚

書退有歸守先壟課子書又天厚其生而成其志也維  
桑與梓必恭敬止況及與先公游而進退之明可稱者  
乎竹之見稱古人實繁獨以其節有類故樂記之以為

魯多君子之徵焉

菊莊記

安陽地稱秀麗昔人引洹水注城內為園池環城之池  
晝夜湯湯民室酒壚擇奇據勝無慮數百區西南匯為  
陂溪山之輸委亭館舟楫之盛麗荷蒲葭柳羽鱗鯉互  
之饒益實最一郡水利不修民生日迫陂遂為陸而亭  
館為墟矣好事者或事築植胥徒一假館花蹂木戕器  
敗屋損供頃少弗恆有遂賈禍者故莫不恣其弊歲而

已焉予歸方事游嬉而無所於適偶送客南郭歸並闥  
閣而西微行詰曲桑榆蔽翳負城有小圃徑造焉地僅  
餘百弓庶廡幽潔問守者曰此王君季貞菊莊也雜花  
並植菊最多故以名時方挺翠怒長羅列滿地愛之不  
忍歸秋風作花見餉十盆品色莫有同者莖高尋丈花  
大徑三寸餘蓋培溉有時芟移有法半歲勤動而後有  
成信菊之拔萃者也季貞知予同其愛介其友請言吾  
方慨吾鄉風物之非昔而嬉游無所於適也能無情乎



淵明曠達芥視軒冕乃獨愛菊屢形詠歌至與松並稱  
茂叔談道有取於蓮並稱者二富貴者在所薄菊獨以  
隱逸稱譜之詠之者又代不絕口其貴重可知已季貞  
其亦慕古人而有見於菊者乎人生之樂隨寓可得口  
體居室不與焉故不他其藝以見其志不侈其圃以納  
其侮百弓之地可游可樂胥徒藐之而不屑來沒吾齒  
莫有睨而規之者求寡而獲豐身安而志遂是莊之得  
不亦多且久乎莊田舍也田舍穀為稱首不莊於穀而

於菊穀吾口之所切菊吾心之所樂吾口寧緩而吾心  
不可不適也心適矣視如京如坻漠如也古有午橋莊  
築山穿池竹木叢萃固盛德之宜居後之主者已墮屠  
兒墓園之譏平泉莊之鴈檜珠柏雖曰僅存尋亦蕪絕  
矣富貴田宅之不可恃如是夫九原可作吾其從晚節  
之老圃乎且吾為人莊而日就荒人為吾莊而不獲一  
稔獨幸得歸而時游王氏菊莊庶幾鄉賢之萬一焉記  
菊莊而及鄉賢者高山仰止吾鄉之士其勿以菊莊為

嬉而已矣

樂閒堂記

人物之生於世安於其素而不知其樂者衆矣魚在水  
獸在山不知其樂也處之涸轍繫之虞人而後知江湖  
山林之樂焉釋而縱之俾復其故則其為樂始真知矣  
物皆然人為甚賤而服賈陸有摧車水有覆舟虎狼盜  
賊風濤蛟龍之險卒然遇之號呼丐命於須臾而後知  
平地之樂也而仕者又甚焉仕而達矣若可樂也而其

憂苦方叢乎其前事有必爭而不容已者不爭則獲罪  
君子遺誚後世爭則彼方震以雷霆壓以山嶽惑以黃  
鼓大廷列坐十九瀾倒而欲以抔土障之當是時也思  
得釋去重負歸為閒人則其樂為何如此憂也有苦焉  
造謁之疲精神迎送之勞筋力晨興趨府干請至至折  
簡函文手未及展而繼者沓至至擁馬不得前暮歸復  
爾寒暑不間休假匿避若遁逃堅閉若自錮一接賓迹  
遂終日不得食思得脫巾履偃仰牀第又如蓬萊之不

可到也上則不能過矢去川決之政下則不能厭蠅豕  
貪之求憂苦雖極謗議紛起矣夫人未嘗不知閒之為  
樂而真知者寡予盖身履其境急遽疲極而後獲閒其  
為真知猶坐中談虎而嘗被齧者也鄉人孫遺賢受益  
居安陽銅冶治卓宛之業而以清慎聞於人集賢院降  
劄褒之曰樂閒冲素處士集賢握玉章司天下道教凡  
名隱者率號處士又華以冠之受益因以樂閒顏其堂  
乞言於予受益不游不試不險於途不困於責安於其

素而能知其樂者乎其知不知予不能知而集賢標榜之其知其能知其樂也若是則闕而不浮矣雖然受益又當讀涪翁之文知收其餘力而就閒之說則可以永此樂矣

傳

馬棡傳

棡字敬孚姓馬氏楚王殷之後也六世祖珍始居衡闕

合禮稱黃氏卒再娶黃氏生子熙年已四十九榜書室  
曰栖碧山房因自號碧山居士世味淡然惟教子是務  
或謂君老而子業科文不可待也不若為小者近者曰  
吾兒當師天下士以昌其學君之言不敢知喜飲好客  
醉輒歌歸去來辭人不測也嘗語熙曰學可恃財不可  
恃利吾財害吾身未有利吾學而害吾訓子之言可書

而誦也太史公謂巖穴之士名堙滅而不稱非附青雲之士惡能施於後世有士不足附以施於後世然其行若言則可傳必矣可不傳乎

序

涅陽侯傳序

涅陽侯傳衡陽馬熙明初之所著也予三復而悲之蓋有感焉夫行不足以範世言不足以垂訓功不足以及人文不足以明理汗牛充棟可勝道哉而可傳不傳者



又不知其幾人也人且若是況物乎涅陽侯枚氏自燧  
人氏而降功莫與京虞初稗官詩人歌詠舉不及焉明  
初慨然筆之其祖孫之逖邇族屬之內外隱見之始終  
名字之同異施用徵求之迹詳而覈矣予幼居湘漢間  
但聞其狀至燕始識之特磻與硃爾其族類未識也大  
官權酤五十四大坊資其用尤多性不厭貧下乘車過  
市細人挈箕斗出三二錢即可致大坊抒竈有心未盡  
灰貧子掇拾資其餘力焉京師百萬家不有枚氏則辛

蘇氏馬通氏不能濟其三二焉思有以發揮其功書題  
於壁若冊者餘二十年而竟未有以發之也歸鄉里始  
識其族而明初之傳出矣湘南栗穆祝崧氏之族自昔  
柄用其地江漢則狄氏盧氏羅居水許枚邈在中土人  
不知也後至元壬午始見於蘄黃山中遂乘舟入江夏  
狄氏盧氏俱為歛迹主狄盧者怨焉其亦不智哉承平  
久民生日夥枚氏不至江夏狄盧氏將不赤族乎予方  
欲考其從來觀明初傳始知將烹宏羊時枚氏遠遯江

南此蓋其裔也予投劾歸明初不以予不能有所成而見棄也方且相從教予子時出傑作以自樂予愧於明初多矣序其傳而表之俾世之見者知明初有史才而不試又以見夫人物之遇不遇有幸不幸焉古今不幸而不遇者多矣枚有幸而遇明初而明初不幸猶未遇也雖然是傳之出識者見之明初其亦有遇矣昌黎先生作毛穎傳在予且以為怪舊史無足責焉是傳也其文之有益於世者乎觀者其勿以子虛烏有視之

長短句

沁園春甲申臨清舟中次韓伯高見贈韻代書

寄可行

草木無情不問寒暄開時便開只黃花多事偏憐隱逸  
白頭何補應避賢才老友相逢清談絕倒休校劉郎去後  
栽尊中物勝它年千里漫寄寒梅 神仙合住蓬萊柰  
老去思兒忍不回任景莊槐老誰為癡夢梅家酒美且  
浣幽懷渭北江東暮雲春樹何日扁舟更此來公知否

便連朝觴詠能幾徘徊

可行弟泰定甲子壽日賦樂府沁園春時讀書  
上庠因勉其進學後三十九年至正壬寅同在  
京華遇其日語及舊作遂再和前韻

四海之間難弟劣兄白頭二人記昌期瑞旦行年在卯  
善門餘慶維嶽生申科第佳名祠宗優秩常奉天香降  
紫宸身通貴只貧安分定老益書親簡編不負辛勤

羨進德揚名邁等倫任家無厚積融融度日詩多好句

藹藹回春明月清風交梨火棗竹裏行厨脯擘麟吾何  
事但問花携酒專競芳辰

三

甲子壽和  
見壽韻

天相吾家篋笥無金詩書有人看發揮胸臆詞源滾滾  
薰陶氣質韋佩申申師友淵源人材衡鑑胄館光華近  
帝宸男兒事便盡輸心力難報君親 讀書第一當勤  
只孝弟書中是大倫歎人生為學百年在幼田家得計  
一歲惟春科占龍頭名高鴈序好與皇家作鳳麟都休

校是地鍾河岳天降星辰

水龍吟

己亥中秋  
用壻韻

一生白浪紅塵得歸才見乾坤闊三升無分如何料理  
文園消渴衰病禁持不教杖履經丘尋壑記平生懷抱  
曾逢惡處都不似今年惡見說圭塘如舊賴山英好  
看猿鶴夢中斗室蠹殘圖史塵凝鐺杓蟾桂香多莫將  
長笛等閒吹落問嫦娥我輩何時還又享清平樂

二

壽靜公  
右平章

歷觀今古名臣求如公者人能幾平生勲業行其無事  
一誠而已方信名言臣門如市臣心如冰政乾坤清晏  
飄然高蹈非明哲安能此 太古歲寒松柏儘春風開  
開桃李傳巖霖雨蘇門風月無非天理莫訝求閒從來  
老眼閱人多矣待他年鳳詔九重重下為蒼生起

綠頭鴨

八月十四日  
圭塘翫月

廣寒宮秋期明日方中歎陰晴自來難定何如今夕從  
容棹蘭舟亂穿波月斟玉斝清帶荷風身世難期歡娛



易失名言千載記坡公公曾道涼天佳月何必限春冬  
況更有西賓共載仙季相從 笑踈狂興來無盡艤舟  
更策吟筇任諸君班荆藉草環四岸度竹寄松飛上崇  
臺放開老眼水輪誰遣却朦朧多應是嫦娥見妬勝事  
不教窮天知我須臾風起萬里雲空

二為牧  
庵壽

論斯文世誰方駕韓歐渺翩翩舊家人物一峰玉立高  
秋走蒲輪鑾坡再至照藜杖石室重紉要使吾元典章

文物輝光什伯夏殷周君信否千言乘醉字字花雕鏤  
侔堂陣寄言渠輩且避戈矛憶當年江湖來往月明  
太乙仙舟洒烏絲芙蓉秋水振宮錦杜若芳洲鸞鶴賡  
歌魚龍迎舞人間元自有天遊倘來物視之毫許豈足  
辱回頭終焉計匡廬深處已辦菟裘

水調歌頭

庚寅秋即席次  
可行見壽韻

歸歟正宜早動也貴研幾夜深山月飛出何地不揚輝  
休說采山釣水政爾切風批月底用朶吾頤萬事一尊

酒身外復何為  
笑年來人與我不相知  
投林已分垂翅  
猶勸九天飛  
敢效歸鄉錦綉  
且就盤鈴傀儡  
白日看兒嬉  
但恐子掀舉  
誰與話襟期

鵲橋仙

壽何聰  
山平章

羈身名爵醉心糟粕  
政可束之高閣  
廟堂誰信是行窩  
更高似堽夫一着  
胸中磅礴  
眼前寥廓  
與物元無城郭  
自從席末挹春風  
覺二十年来盡錯

南鄉子

和歐陽  
玄之韻

高論聽懸河先和新詞問老坡手冷不甘寒氣早誰呵  
更被黃花笑鬢皤風竹亂婆婆老我衰顏藉酒酡佳  
節重逢真可賞賡歌陶令壺觴旨且多

二

健筆挽銀河公直鑿坡我諫坡只好老來供一笑訶呵  
喜怒因人愧國皤花月共婆婆勸飲隨君學邵酡松  
菊有盟休冷落哦歌我輩同年甚不多

三

夜寒無寐仍就韻湊  
來粗語以供一粲

烏鵲欲填河螾蚳多持更上坡蟲鳥無知徒自苦誰呵  
恰似貪人少已皤市也好婆婆要染先生面色酡有  
口難言今只可狂歌終歲陶陶不是多

念奴嬌

汴中見寄

一壺天地亘南交朔漠東溟西極斫桂吳剛難措手轉  
見今宵挺特露軋冰輪雲歸碧海上下瓊瑤色白虛光  
裏更無毫髮間隔夢想洹上池臺五年放浪延賞無  
虛席底事夷山丞節鎮擾擾塵埃朱墨傑句才慳深杯

量減况敢論勲業嫦娥應道老當歸去時節

春從天上来

祝一齋  
大叅壽

自古英雄試倒指誰能廊廟雍容相君此遇風虎雲龍  
光掩前后諸公政天開治運力啓沃宸衷况平生把詩  
書禮樂爛熟胸中 當年側聞先德只一語喚起萬室  
春風桂樹成叢棣華聯萼總是舊日陰功恠昨宵雪霽  
烟光薄生意浮空我来為壽相期何以維嶽維嵩

太常引

荷盤蕉扇久無聲笑祈禱果難憑倚檻看雲停問誰把  
天瓢詎傾 玄功不宰太平有象礪礪一時平老我問  
陰晴笑尚為蒼生有情

千秋歲

即席次可行  
見壽樂府韻

謾人稱好何似歸來早營五畝如三島深杯江海淺老  
眼乾坤小松竹在肯教老圃秋容老 方外多真趣池  
上宜清曉隨里社遊鄉校逢場皆可樂得句唯供笑吾  
有政考功不校間官考

二

青年詩好政坐聲名早攀李杜凌郊島官慚才力弱技  
悟文章小青鏡裏朱顏不覺成衰老 習氣消除盡惟  
酒娛昏曉思阮子甘兵校因知身外事何似尊前笑追  
往昔中書已署陽城考

鷓鴣天

夜長臂痛手摩展轉不能寐霜曉窓明  
太常弟適至因試浙筆書枕上所得長

短句三首呈賢弟一笑仍  
請子姪輩一和以暢老懷

白髮京華戀俸錢溪山游釣惜無緣老來惡興憑詩遣



枕上才成一兩聯 人自苦月空圓  
衾裯如鐵夜如年

但稽子姪新文學莫問賓朋歲幾遷

心到忘機便是仙  
琴能得趣任無絃  
病多課子酬文債  
田少從人借酒錢  
生盛世遇今年  
雕蟲存藁不求傳  
有言難盡閒中樂  
竹影花香白晝眠

浣溪沙

老境閒門晝不開  
閒人庭院甚宜苔  
打門詩債任渠催  
千里有家頻入夢  
一春無酒可開懷  
心寬隨處是蓬

菜

柳梢青

老病客燕。值此艱歲。口腹甚窘。記少年寓湖湘。讀書時度日。情況誦秦少游柳

稍青樂府。依其調作俚曲。以遣興。南方適口多品。此則記予之偏嗜。而多用者。可行。蓋亦知味。請同賦資。

一笑云

窓對晴嵐。門臨流水。坐閱歸帆。為口勞心。雪猶燒笋。霜便分柑。酒香梅下。茅菴就湖。置新魚滿籃。夢記當年此。昏身享好箇江南。

可行太常弟即席次韻

遠岫浮嵐澄江拖練飛夢雲帆樂事關心菊朝烹蟹燈  
夜傳柑 春郊隨處行菴聽騶從携花幾籃洲渚凝妝  
園林窮勝好箇江南

二

山潤浮嵐溪清呈底畫舫無帆酒友詩朋香芹鮮鯽綠  
橘黃柑 風亭月榭雲菴更奇品花盆果籃城市繁華  
湖山佳麗好箇江南

時有孚侍坐不辭同賦復謹步嚴韻四闋以求

斤削或可忘暑

山霽無嵐尋幽有屐不用張帆樂事關心良辰脩禊元  
夜傳柑芳郊隨處行菴聽騶導檐花幾籃洲渚凝妝  
笙歌歸院好箇江南

二

雲岫如嵐月池通港畫舫無帆細葛春纖摘來盧橘香  
賽溫柑荷亭柳榭松菴更奇品花盆果籃夢想飛觥  
水晶宮裏好箇江南

三

疊嶂浮嵐澄江拖練遠浦歸帆橙蠃分甘萼鱸專美露  
酒霜柑登高聊憇禪菴採菊莖茱萸滿籃丹桂飄香  
芙蓉弄色好箇江南

四


山遠生嵐溪清呈底棹收帆風物依然爛紅茶樹碧  
色青柑暗香寒阻梅菴把楮穎權收墨籃煖閣紅爐  
淺斟低唱好箇江南

圭塘小藁別集卷一

謹按第六頁前五行阿魯舊作阿魯今改  
十二頁前一行阿爾奇舊作阿刺吉今改  
十  
五頁前六行僧格實哩舊作相閣實理今改  
後四行托克托穆爾舊作脫脫木兒今改  
十  
八頁前二行沃稜舊作幹藥今改







總校官進士臣胡榮

校對官編修臣沈清藻

謄錄貢生臣張誠智

欽定四庫全書叢要

集部

圭塘小藁別集卷二



詳校官助教臣謝登雋


欽定四庫全書薈要卷一萬六千三百二十五

集部

圭塘小藁別集卷二

元 許有壬撰

和虞伯生學士壁間韻

  
在抱隱憂出塞得奇觀青山萬馬奔龍門忽中斷地  
平豁四維天闊張一幔寄語鳴笳兒休驚暮鴻散

和謝敬德學士題蘇武泣別圖韻

死節吾已矣生還又不如天王非太忍臣罪不勝誅

二

親交生別去子復棄遐荒只道還家好還家恨更長

病起漫述

南烹習若性出塞勉隨俗老饕不慎口藏神畏多肉流  
歎引銀杯馬湏注盈腹河魚巧伺人乘間頗肆酷瞑作  
還達曙腸雷殷空谷三日不能朝一餐惟可粥中年體  
易虛攬鏡笑盲目今朝氣漸蘓鼓勇出衾褥翰墨試短  
吟經史時引讀朝來酒入務清話慰幽獨嗟予未聞道

結髮事干祿素餐古有譏伴食今不惡士貴早知止聖  
許不遠復歸哉復歸哉瓦盆安脫粟

張禮部溪山真樂圖

悠悠春天雲想見平時閒獨遊溪橋上暮倚山堂間澹  
然不知愁亦復忘所歡出山初無心既出還思山蒼生  
待霖雨欲歸良獨難山堂恨何許蕭蕭松桂寒

次韻伯英二決明羹

美哉石決明江珧敢爭先上界多官府肉饌繫飛仙何

如草決明秋雨顏色鮮羹材在屋角採掇不論錢名同  
姓異氏恂濟誰非賢一變故足矣並畜吾不然平生負  
此腹藜苳亦便便幸免殺生罪復無汙腸羶諸石請絕  
交阿草日食前眼明讀舊書歸歟了殘年豈無五畝園  
自卜休問天食經聽君斲種法儻肯傳

立秋

灤京長夏似涼秋況此持權屬蓐收莫使風霜便為厲  
九天龍馭即回輶

次虞伯生跋馬伯庸詩韻

齒髮年年改風霜日日寒誰知台輔客恰似廣文官

二

酒觴時一熟詩骨自多寒智不如樗里文猶可裨官

養馬戶次伯庸韻

盛冬裘未完豐歲食不足為民籍驛夫馬骨猶我骨束  
芻與斗菽俱自血汗出才釋鷹師鞍又服梵子服邊聲  
或玄象去馬便可哭朝廷播政令黎庶供力役兒女甘

作奴養馬願飼粟源源急星火金符出黃屋譬舟苟使覆  
載物其能淑百年具成規受地貧安糲粟麥被陽阪黍  
稌滿寒谷園蔬接畛青樹果屯雲黑一朝化榛莽坐使歌  
成泣我身非土梗我心匪鐵石糊口有四方從渠安傳食

省中對雨獨坐

風土迎秋便作寒隔簾飛雨更斑斑可人几榻清如洗  
終日情懷淡似閑窓外天開千丈闕牆頭雲放一分山  
腐儒獨坐成何事寫出新詩亦強顏



送傑古愚上人奉詔歸山

墨名儒行迹雖殊進退中間見讀書一覲清光便歸去  
古人政自不如愚

寄趙秉彛

從軍苦樂不難明肯使毛錐負此生鐵騎蹴雲秋校獵  
油幢敲雨夜論兵髮應瘡癘催全白詩爲江山助益清  
詔下凱還今有日阿繇聞已候門迎

七夕露坐感牛女事因成駁雜無實之言

別況經年慣佳期此夕逢終天爲伉儷一水任西東人  
世非無鵲羈窻漸有蛩廊州共明月應是憶衰翁

紫菊和虞伯生韻

天賦幽妍處士花誰將朝服苦相加薇垣有露沾秋色  
芝嶺無霜抗日華蟹出更宜彭澤酒筍香誰羨建溪茶  
坡仙一語推醽醁只在姚家與魏家

庚申題馮致遠二畫卷越十八年攜以來謁次  
韻歸之

世情物態日悠悠  
習得襟懷淡似秋  
畢竟人間有歸處  
五湖烟水一扁舟

半生蹤跡徧堪輿  
與世求疎尚未殊  
試把山林校朝市  
移文猶勝絕交書

次仲野堂

三首

綠李來禽繞屋疎  
秋眠不著鳥相呼  
雨聲偏向竹間好  
山色微從烟際無

秋林雨色上蒼苔  
不是花時還獨來  
更待窮冬晴月夜

草鞋踏雪看黃梅

雲自知歸鳥自還一堂足了一生閒  
門前剥啄定佳客  
簷外孱顏皆好山

題宣和風雨孤舟圖

龍樓嫌富麗著意貌荒寒  
烟雨迷千樹風波恃一竿  
時移毫素在身老塞垣難玩物  
昭前訓誰將進縣官

題趙幹江樓風雨圖

人間最爾東南陬金陵李家無遠謀  
詞華欲繼後庭曲

不見東風空小樓當時百事尚纖麗況在畫工專末技  
洪河喬嶽昧平生曲闌幽檻窮清致石頭城下無重關  
甲馬營中有佳氣九天飛墮曹將軍盡捲版圖充上計  
小兒造化吁可憐乾坤又到宣和年君王搖毫自塗抹  
片紙落世人爭傳坐看南北又分裂遂使兩家同一天  
偶從斷鱗閱小景慨念興亡豈天定而今蕩蕩混一圖  
但少儂歸理釣艇

崇真宮葵花

繞砌亭亭畫影間相逢幸未及開殘紅妝洗露尤宜曉  
素性傾陽不畏寒聖化薰陶等燕越仙家培植有殷韓  
江山信美非吾土日向西風笑倚闌

再用前韻答王仁甫左丞

寒暑催浮景功名負聖時膠榮今老矣得酒且中之才  
不能匡世吾將任采詩藩籬可翔集何用刷天池

二

青年無可畏況到二毛時嘯傲思元亮風流愧牧之莫

談今日夢但詠古人詩已作家書去先開數畝池

汪叔志堪老園

有地皆堪老惟鄉老最

闕

德幸無慚埜

景收全勝村醅取半

闕

與子俱南

送朱主觀之任東萊

樂歲民聲裏名城海氣邊懸知公事少見說長官賢風  
月三千首才名四十年天其昌晚節佳處養胎仙

次韻君謀晚晴即事

懷抱今秋好題詩欲滿牆吾廬吾亦愛一雨一番涼晚  
竹如人瘦新松共我長年來私自喜身世摠相忘

喜間可與弟至京師

鶴樓東北望燕城幾處關河幾日程四載三回勞遠慰  
兩都千里尚難并開書喜報身常健見我應憐老可驚  
咫尺對牀風雨夜此懷多少待君評

題詩藁

風月才情屬少年老夫老矣厭雕鐫病來越覺無詩思



縱有詩成似樂天

思歸

思歸不惜歲如流  
日望西風早作秋  
只知倦客還家好  
不見西風催白頭

連雨有感

病來連日雨  
渾似熟梅時  
雲岫青才露  
風簷白又垂  
陰晴如善謔  
寒燠遽交馳  
會見驅屏翳  
清明萬里宜

次賈伯堅左司寄來韻

四首

清風千里墨痕香  
琢出天球潤似肪  
已爲郢歌翻白雪  
更將仙杵搗玄霜

酒來宛國注紅香  
魚出涼亭薦雪肪  
多病浪仙都負此  
空哦清句嚼冰霜

書室惟須辟蠹香  
鋤刀誰遣試蠶肪  
相思夜夜秋衾夢  
菊有黃華蟹已霜

賜霑魚鳳玉脂香  
大笑輕身服鴈肪  
華髮侍臣歸有日  
駕鸞先報一天霜

題梨花鸚鵡扇頭

言非鸚鵡莫詭詭力不能高忍爾庖白雪香中風日好  
慎毋踰濟更來巢

和蘇伯脩侍郎寓居雜詩

謏才寧適用奇貨本難居羈旅誰相慰親朋日有書看  
雲歎舒卷閱市驗盈虛昨夜秋風起江湖好食魚

二

心憐無所用道愧不成章下直才能館從公又馬坊埜

風香列帳簷日轉迴廊花下歸來晚庭榆倒影長

三

有謀空落落無事亦忽忽一代名何用千年論始公清  
風生筆硯涼月到房櫳亦有娛心處兵厨酒不空

北苑馬上

古木陰陰覆苑牆鴈程霜早碧雲長欲知聖德如天大  
最近來庭是越裳

高榆矮柳遠參差一幕秋空碧四垂莫笑從臣歸太急

人間天上共秋期

萬事浮雲一瞬過何勞辯口似懸河北風捲雨城南去  
明日灤江水又多

金蓮紫菊帶烟鋪畫出雲岡萬世圖直使王嫱到青塚  
漢家當日有人無

分省有大研予乙亥歲嘗用之丁丑又日用知其美不知其奇一日滌去積墨文彩溢目波浪  
洶湧背刻翠濤字亦精勁非一洗濯不知也士

有蘊德蓄才遇而不知知而不盡者其長人之  
責乎作詩識之

積墨培光彩貞姿任涅磨浪花浮欲動池影淨相和有  
似懷才者其如眯眼何更憐當造命不解擴恩波

代書寄可行弟

十首

灤京尺素寄沙羨料理田園有事宜檢校便當勤檢校  
參知行欲自參知

祠堂花木已繁陰見說栽培用力深南土常年秋喜早

更宜澆灌待成林

叔季勤勞共相攸爲予高作蓄書樓先公遺後一萬卷  
明日投簪去校讎

樓後樓前地有餘埜心常愛樹扶疎四時花木須栽徧  
更作蓮池就偃潏

漢川雲夢有租田今歲應逢大有年約束諸僮公出納  
羨餘畱糶杖頭錢

雙鶴廣陵來敝廬啄苔穿竹日相娛莫教忘却蹢躅態

歲晚待渠從老夫

桂花初放小山幽更有蒲萄映石榴  
食實折花歸有日  
休教蕪穢負清秋

當年手自植  
柟櫨別後長添幾尺餘  
說與園丁宜善視  
老饕歸欲食其魚

文竹移栽只五根  
來時無數長兒孫  
不因繁冗休輕剪  
要使清陰過酒尊

眼花齒動鬢斑斑  
三十年来不暫閒  
多少家庭纖悉事



從今先約莫相關

和謝敬德雜詩三首

翠樓天際鬱崢嶸粉澤龍岡壯帝京地勢遠連樓殿起  
簷牙高並鐵竿撐蔥蔥佳氣歸環極穆穆昌期見迓衡  
長樂退朝容緩轡斷雲收雨半山明

長日官曹似馬曹絲桐時得事吟猱救時乏策當投紱  
遣興成詩敢奪袍白海波隨秋雨漲黑山雲壓晚虹高  
清尊長滿朝簪盍誰道驅馳我獨勞

尚服三庚進紫綃清冰沙底未全消魚龍陸海無宮市  
鼓吹鐃歌有徵招自在千年蒼鹿健開粧三日玉驄驕  
最憐學士神仙福終日吟詩不造朝

右酬謝詩計拾貳首今止三首全集共百廿首  
今止伍拾九首維所收亦少半爾諸公序文却  
存附錄於後

記遊

太行之秀至吾鄉西山融結為最幼讀書江南既

仕奔走中外雖兩歸鄉里而憂患荒迷世故縈繞  
望西山如天上不得至也觀郡乘載柳仲塗居蕩  
聞僧惟深言天平泉石過衡嶽遠甚及同游方信  
其言不妄益欲一遊至元四年戊寅歲得請歸九  
月三日甲子偕監郡荀公和叔始為林慮之行午  
出西水門過孫平邵村時百穀已收芋區蔬圃棊  
錯星布柿林如江南橘黃時遠近蔽虧歷流寺固  
縣大風揚塵俄幸止孝親寺僧水冶士大夫暨巡

徽監當官聞來迺晚宿寺中僧西溪年八十八尚  
能款客明日夙興拜韓公墳讀富鄭公所撰碑碑  
有亭故無損石極美碑陰有樹如水墨所畫墳皆  
甃甃完者尚多兵荒中有僧紀公奮身捍蔽卒賴  
其力宅兆形勢風水家圖以為式以為天地間不  
多見憑高歷覽又登寺西南經閣果極其妙高下  
陰顯與圖所傳不異也顧豐安兆域寺燬於兵僧  
徒解散豪右斬木埜人盜甃殘毀殆盡則紀之功

可念也昔魏公以大功德為宋社稷之臣兩墳寺  
皆勅額以之主墳而一得一否亦人力之所不能  
及者乎小酌遂行林州知州李祐之延同知梁思  
誠仲信判官張仕謙子信迓於諸翟晚至州宿萬  
安寺丙寅謁廟學遊黃華山和叔送予出郭北門歸  
祭其故人同知梁仲信諸生李冕咬咬侍行十餘  
里至其麓皆小石榦檟是日大霜水皆冰人謂地  
高寒較他地早一月榦葉青紅可愛路漸高聞水

聲於灌叢亂石中又數里山益高峯峻壁益峭澗  
益深路益險水聲益大峯回路轉掩抱重疊使人  
應接不暇澗皆磐石高下為磴級泉流其上懸而  
為練激而為湍飛花旋碧喧飀飄洒其瀦而為泓  
者清澈如空纖芥可見寺相近屏幃益竒亂石不  
可騎過磐石道左有水磴作屋其上自麓又十里  
至寺山僧三四輩問以古皆不知石柱刻張商英  
絕句詩多言高歡避暑事基字韻叶來字註切其

下他柱多題刻漫滅不可盡讀大率多崇觀間人少憩  
遂入山觀水簾一僧前導山民十餘輩持斧鋤剪榴翳  
掇碎石僅能投足馬不負人且不能登陟人力憊極又  
據鞍不跬步又下若是者逾三里許遂不可騎矣始見  
懸瀑如練於半天騎畱林石間相率牽擁而登焉峻坂  
微徑亂石犖确如梯而無級膠木文錯攀蘿挽條尺寸  
而進賴健卒曳絙於前挽之而登因思東漢封禪記所  
載登泰山事此近似焉數問僧至否以僧言遠近爲喜

畏又三里許始至加遠不能進矣有石突出如屏四向  
無所連著其高入雲所謂挂鏡臺也前有磐石疲甚坐  
其上從者齎酒脯至仲信年六十餘矣懼其不任登陟  
畱之寺中俄亦躡屨以兩卒掖而至又迷路枉里許石  
上望水簾北崖者僅如匹練下濺崖飛白始闊其西者  
崖上垂白亦不過丈許意謂昔人傳誇過實俄從卒持  
二冰柱長五尺許以獻云至簾下得之且盛言其偉遂  
欲即之發火煮酒引滿數爵諸生暨從者遍飲之乃緣



南崖微逕迤邐而西而北坡極陡峻草石皆冰滑不可  
投足尺寸展移栗栗危甚乃至西崖下水簾內仰面而  
望之目力爲窮始見崖上之水飛灑散布疎密勻整自  
崖而下至澗底其長不知幾百丈其闊百餘尺光明透  
澈去人尚五丈許真所謂迸珠簾者也負崖坐石久之  
仲信又跼蹐以酒至爲引數爵力稍蘓攀援而北仲信  
不能從也獨遣其卒挈酒以從轉折而東至北崖簾下  
有巖坐數十人簾之長又過於西者東邊則頗濃厚自

巔至地時如團雪投墜而散連屬不斷加以動搖飛舞如玉龍蜿蜒餘皆與西簾同兩簾皆清氣襲人時時飛灑如細雪著人面信天下之奇觀也簾下沾灑細草皆爲清冰日夕凝積或聳直如玉笋或扶疎如珊瑚蔽崖彌澗奇形怪狀不可殫記瓊田瑶草殆此謂也西崖下望挂鏡臺則培塿矣此山之形奇峯重疊如展畫屏不知高挂鏡臺者又幾百尺周圍環抱而開豁其東臺如門屏而位置偏南臺前之山一遮一掩又不知其幾百

重也始坐磐石疑水簾之小蓋遼遠空闊掩映崖石淡  
然而無加以老目茫茫故也北簾之東又有懸瀑望之  
差小青壁無路不能即而觀也久之循來跡而歸石間  
多蘭土人不識臺上石墜於下者皆爲水波龍鱗之狀  
方平可愛惜路險不能致也與仲信輩罄酒殽而歸歸  
途趨下差覺易僧醉喜甚捧冰如珊瑚者前行至繫馬  
所且乘且步俄至寺前就磐石列壺觴以坐又以紅樹  
及山果之如丹砂者與僧所持冰列於前清泉泠泠過

壺觴間且噉且盥且觴且詠非迫於暮不忍歸也和叔  
率州官載酒迓於郭至寺以所攜水簾泉瀹茗飲之丁  
卯之延子敬同至墨竈山寺殿東椒壁有梅軒佚老貞  
元癸酉歲所題文字皆奇其下殘缺石柱多宋人題名  
緣石磴登方丈鳴箏小酌從者得雉爲炙以侑觴題詩  
於東壁而出至硤峪東二里餘支提龕琢石崖爲之有  
開元十九年蔡景所撰碑刻甚精寺前流泉怪石不減  
皇華寺有巨槐蔭地數畝山門有白松皮葉皆異磚塔

嵌張商英聖燈石刻聖燈寺在西北絕頂望之隱隱見其殿宇僧云蓋四十里之遙舊傳聖燈誠懃拜禱則見商英而後見者多自矜必刻石以紀近年元遺山亦有詩紀之和叔云某官甚不叶人望亦嘗禱而見之余不禱也余服其言清泉瀾瀾循殿階而流歷石磴至方丈望五松亭方丈西有磐石坐於是得山尤佳午和叔治具張樂夜分始休夢回泉聲滿耳可以消酒戍辰早浴於寺之浴室題名白松刻石後殿石柱之延子敬歸和

叔入浴余獨乘月登陟坐松下磐石僧有普靜者善感  
策終日獻藝至是又挈其徒按羯鼓笙笛鏗鉤交奏迭  
作於月明松影中清風颯然山鳴谷應不知此身之在  
人世也長老勝祥又進數尊而後歸寢昔歐謝諸公遊  
嵩山見石室汪僧叩厥至論余之游乃得此輩可爲一  
笑然亦陶寫終日正自不惡此山秀拔在黃華之右至  
於水簾之奇偉與夫遮掩環抱重疊深遠則不及也二  
山之泉皆去山數里沃入地中已已將遊栖霞和叔謂

其地無大奇計程欲以九日登鳳寧山遂不果往東迴  
過諸翟翟曲宿下洹庚午至鳳寧山山在洹水之陰峭  
峻奇秀望之如鳳聳石爲兩翼上各有亭其巔又爲亭  
亭上爲屋兩重壙三聖女其上有金泰和間碑載赫舍  
哩氏所建三女則不能究其氏族也山多古柏路甚險  
登之甚勞既至其巔則俯瞰二亭若井底坐久風急始  
徹俎而下過南齊觀丈八佛大磚浮屠貯佛其中有紹  
聖間石刻過槎牙嶺至善應宿儲祥宮宮有洞房以磧

爲之辛未登西樓和元裕之詩遣捕魚得鯉鯽活躍几  
 席前午泛舟觀泉於宮之西泉皆洄之狀流而突出石  
 崖下騰湧有歷下所謂趵突者清澈尤甚土人疏導作  
 堰以激磴碾爲利甚大登龍祠祠下泉出尤怒日已暮  
 道人載酒於岸以俟遂醉而歸仍宿宮中壬申道人擊  
 雲璈侑觴方盤桓殿廡求盜二人報大尹杜公率其屬  
 逐二日不得已遂歸往返九日游歷四百里山中憩息  
 則有從者絃歌之娛馬上疲憊則聽和叔劇論可以醒



塵思遣睡魔餘力所及得詩凡三十四首姑錄之以記  
歲月所不足者天平柳公仲塗所游西山最勝者和叔  
謂其地險甚且路經大雨不可行栖霞又尼於猶豫而  
玉泉澤陽諸山皆有可觀未得歷至張本於是尙有待  
於他日焉

出郭

萬慮攻催雪滿頭還鄉纔得縱遨遊太行雲盡青浮曉  
洹水霜餘碧染秋漸老始知閒有味此回真與世無求

溪山好處鴟夷滿  
況有風流老郡侯

出郭見柿園如江南橘林

落日郊原秋滿烟  
煌煌星火爛將然  
一時喚醒江南夢  
恰似洞庭霜後天

水冶道中

人煙仍古邑  
村落帶清泉  
脩竹雲千畝  
垂楊綠半天  
滌場餘滯穗  
沽酒驗豐年  
欲結雞豚社  
慙無二頃田

題水冶寺

永額僧知宋佳城石紀韓懷賢時拊髀弔古一凭闌清  
夢雲龕靜悲歌野樹寒山川豈專美東北又豐安

謁韓墳

考譜披圖總未真兩迴親得拜公墳降神生作三朝相  
聚氣噓爲五色雲宅兆發靈符厚德碑銘無愧有奇勲  
憑高更欲推形勢遠樹寒鴉滿夕曛

張彥謙署令以山水橫披見贈次卷中詩韻而  
歸之

霜溪帶寒沙西山展晴麓已從招提遊更就招提宿烟霞遂埜逸宇宙入清曠歸來復歸來鄰翁酒初熟

途中口號 二首

人人載酒具盤殮盡說監州昔有恩底事當途羅几案只愁旌旆過柴門

城郭囂塵厭往還出城依舊不能閒野人豈識予心事只羨丹墀第二班

游黃華寺始至其麓喜而為詩

榭榭連山麓霜餘翠間紅架巖茅屋小分水石渠通漸  
覺烟霏重時疑道路窮升高宜努力中止戒瘵痼

和崔信叔欲卜鄰黃華

二首

昔年拄杖百錢遊曾到黃華最上頭案此畫圖分中半  
與君來往亦風流人生早退爲難得心約真同蓋不謀  
加以數年婚嫁了移文儻肯少寬不

哀樂中年已倦遊舊山頻夢大刀頭高歡殿後雲猶在  
王母祠前水自流涉世到頭渾是錯得歸真箇善爲謀

溪堂萬卷同君讀此樂人間果有不

黃華山中雜詩

四首

道人解後一開顏爲借叩枝策我屨鳥語畱人還小住  
晚風吹破水中山

緣山詰曲路偏賒路轉山回境益佳寄語安排好東絹  
爲君斷取上黃華

手拄一條青竹杖真成自挂百錢遊夕陽欲下山更好  
林深無人不可畱

掛鏡臺西掛玉龍  
半山飛雪舞天風  
寒雲直上三千尺  
人道高歡避暑宮

黃華山次鹿庵韻

吾聞林慮西茲惟羣山會  
一舍入高寒百里見空翠  
雄踞魏韓境特立宇宙內  
雪浪驚起陸天花亂縈帶排雲  
列奇峯極目認涯際  
出泉如江河巖壑困橫潰  
轉曲路疑盡喧飀地  
將沸千崖與高秋  
一徑穿雲細仙凡幾塵  
隔跬步萬景萃  
攀緣攻折屐馳騁  
謝攬轡水簾真雄偉

清響落天外淵客泣淋漓天孫織織麗空明幾百丈振  
古捲不易清冰瑤草亂白日洞天闕自非骨有仙未許  
踐福地磐石几席陳魯酒穀藪配道士山中宜宰相山  
中貴泉石聽吾言吾言諒非戲

題墨竈寺方丈東壁

四圍嵐氣濕人衣五馬行秋弭節時莫遣鳴笳響空翠  
恐教猿鶴怪歸遲

次雲山上人韻



雲埋墨竈久無烟散作晴嵐簇馬前白石清泉有今日  
紅塵烏帽笑當年

出山次衣字韻

黃葉紛紛落滿衣山僧扶袖下山時莫嫌款段非良足  
老子行山正要遲

墨竈寺追和緱山先生韻

丹霞圓鎖翠潭潭仰面青天鏡出函解組已能辭好爵  
判山還欲署新銜冷傳霜信風生谷清遶雲根月滿巖

却憶瓊江舊林壑幾多烟霧護松杉

烘峪山寶巖寺 二首

擇勝何年著梵宮目窮猶未盡重重翠紅照耀三千界  
屏障周圍十二峯雪澗清泉響寒玉雲巖喬木捲蒼龍  
尚憐不盡登臨興天際危亭見五松

煙嵐融翠濕濛濛石路縈紆細入空明月百壺松影下  
清風一榻水聲中聖燈不爲吾儕現俗樂誰令釋子通  
兩宿豈能窮勝事山門愁見馬頭東

峒峪寄可行弟

千巖萬壑鬱蒼蒼  
葉正殷紅菊正黃  
莫訝荒遊倦回轡  
要因高處過重陽

靜師感策歌

霜清萬籟于喁收  
老月軋露寒波流  
山僧具眼識埜逸  
醉挾楚竹來鳴秋  
一聲透空石盡裂  
剛風不動雲夷猶  
驚猿無地避清

闕

愁激揚初似士引角

嬌滑忽如鶯轉喉

闕

縷貫冰蠶繹繹獨繭抽

仙燈定從闕

雲師儔昌黎不用笑高唱

形骸散浪爲闕

月正午諸僧舉白紛獻酬

歸眠闕

風颼颼

崑崙用鹿庵韻

穿雲驕馬闕

層峰爭離奇一一青雲邊懸

泉走白虹遙岑生紫烟肺腑巧遮掩岡巒隨折旋我有  
扶老筇不讓歸湖船三日得其凡動念窮其巔便將巢  
雲松終歲看玉蓮誰能共幽討未用譏流連

九日登鳳寧山

亭亭鳳寧山形勢若飛動胡爲不飛去仙真此搏控靈  
跡既不悶烟霞遂增重城居見其圖清賞時入夢今朝  
事幽尋霜風肅飛鞚適與佳節會更與佳人共危亭構  
兩翼飛雲連畫棟翠柏瀉秋聲紅樹列清供遐觀千里  
近長歌百杯送洹流嗽其根俯瞰清可弄陟降自忘疲  
酬酢益豪縱牛山何用悲茲方待鳴鳳

過南齊觀丈八石佛僧云得之田中耕者始見

其頂隨發隨出因作浮屠居之

教已由天降人猶入地求生民因狂走滄海遂橫流塔  
影千年月松聲萬壑秋考碑當紹聖文物正崇脩

游善應次元裕之韻

兔絲休羨倚蓬麻鳳鳥還來訪竹花昨夜山翁宿何地  
水雲深處玉皇家

溪山好策一枝藤學得襟懷淡似僧舊習掃除猶未盡  
畱詩聊用記吾曾

幾處青旗映小橋  
村醪時用慰無聊  
我來本是逃名姓  
莫爲題詩更自標

猿鶴烟霞日漸親  
黃扉人已作山人  
只應堂下潺潺水  
洗盡東華舊染塵

琳宮夜靜覺寒生  
霜碧澄澄浸月明  
滿耳驚濤不成寐  
四山雲樹更秋聲

善應泛舟 二首

霜水清深處  
烟嵐紫翠間  
清風時信棹  
落日正宜山  
空


閑凝絲竹潺湲響珮環道人磐石畔崇酒待予還  
郡西風物皆吾土十二年間到兩迴不是觥船有今日  
溪山渾似不曾來

圭塘小藁別集卷二



謹按第十九頁前四行赫舍哩舊作紇石烈今改





總校官進士臣胡榮

校對官修撰臣吳錫齡

謄錄監生臣楊省魯